

Meerartaarnermut atatillugu aningaasaateqarfiliornissaq siunertaralugu inatsisissatut siunnersuummik Naalakkersuisut suliaqaqqullugit Inatsisartut aalajangiiffigisassaattut siunnersuut. Aningaasaateqarfiup sulinermikku akissarsiallit meerartaarnermut atatillugu akissaateqartinneqarnissamut periarfissaqanngitsut ullormusiaqartitsinermit pioreersumit pitsaanagerusumik akissaateqalernissaat qulakkiissavaa, taakkua pisortani imaluunniit namminersortuni sulisuunerat apeqqutaatinnagu.

(Inatsisartunut ilaasortamik Naaja Nathanielsenimit, Inuit Ataqtigiit, saqqummiunneqartoq)

pillugu

Ilaqtariinnermut Ataatsimiititaliap

ISUMALIUTISSIISUTAA

Aalajangiiffigisassatut siunnersuutip aappassaaneernejarnerani saqqummiunneqartoq

Ilaqtariinnermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Debora Kleist, Inuit Ataqtigiit
Inatsisartunut ilaasortaq Jane Petersen, Inuit Ataqtigiit
Inatsisartunut ilaasortaq Astrid Fleischer Rex, Demokraatit
Inatsisartunut ilaasortaq Ruth Heilmann, Siumut
Inatsisartunut ilaasortaq Knud Kristiansen, Atassut

Ulloq 12. oktober 2010-mi siunnersuutip siullermeernejarnerani sukumiinerusumik suliarineqartussanngorlugu Ilaqtariinnermut Ataatsimiititaliamut innersuussutigineqarpoq.

Siullermeerinerup kingorna aalajangiiffigisassatut siunnersuut Ilaqtariinnermut Ataatsimiititaliap sukumiisumik suliaraa.

Siunnersuutip imarisaa siunertaalu.

Meerartaarnermut atatillugu aningaasaateqarfik pillugu inatsisissatut siunnersuummik Naalakkersuisut saqqummiussinissaat aalajangiiffigisassatut siunnersuuteqarnikkut siunnersuuteqartup kissaatigaa. Meerartaarnermut atatillugu sulinnigiffeqartitaanerup nalaani inatsisitigut periarfissarititaasut saniatigut malittarisassat atuuttut naapertorlugit ullormusiat pillugit isumaqtigiissutit tunngavigalugit aningaasalersorneqarnissamut

pisinnaatitaaffeqanngitsut pisortani namminersortunilu sulisartut amerlanerusunik taartisiaqartinneqartarlernissaat inatsimmi qulakkeerniarneqarpoq.

Siunnersuut Inatsisartuni siullermeerneqarnera.

Meerartaarnermut atatillugu aningaasaateqarfik pillugu siunnersuut oqaaseqartartunit assigiinngitsunit ilaasortanillu allanit oqallinnermi peqataasunit annertuumik tapersorsorneqartoq siunnersuutip siullermeerneqarnerani oqaatigineqarpoq. Taamaakkaluartoq ilaatigut namminersorlutik inuussutissarsiutillit mikinerusut akiliuteqarnissaannik Atassutip Siumullu nangaanartoqartitsinerisa saniatigut aningaasaateqarfimmut kikkut akiliuteqartassanersut ersarissumik oqariartuuteqartoqanngilaq. Siunnersuutip aningaasaqarnikkut allaffissornikkullu kinguneqaatissai pillugit sukumiisumik misissuisoqarnissaa Demokraatit eqqumaffigeqquvaat meerartaarnermulli atatillugu aningaasaateqarfik kikkunnit aningaasalersorneqassanersoq ersernerluttumik oqariartuuteqarlutik. Sulisitsisup sulisartullu akornanni nammaqatigiittoqarnissaa IA-p oqaatigaa, meerartaarnermulli atatillugu aningaasaateqarfik qanoq aningaasalersorneqassanersoq erseqqissumik inaarutaasumillu neqeroorummik oqariartuuteqaratik. Suliffeqarnermi illuatungeriit kattuffii aaqiissutissamik nassaaqqaarniartariaqartut Naalakkersuisut oqaatigaa. Siunnersuut ilusimisut iluseqartoq Naalakkersuisut tapersorsorinnaanngilaat, siunnersuutilli Akileraartarnermut Atuagarissaarnermullu Ataatsimiititaliarsuup isumaliutersuutaanut ilanngunneqassasoq kaammattuutigalugu.

Ataatsimiititaliap siunnersuummik suliarinninnera

Siunnersuummut siunnersuuteqartup tunngaviatigut isummersuutaa Ilaqutariinnermut Ataatsimiititaliap isumaqatigisorujussuvaa, taamaalilluni inatsisini aalajangersagaareersut saniatigut sulisartut meerartaarnermut atatillugu aningaasaateqarfimmut allatuulli aningaasalersuinissamut piginnaatitaaffeqarniassammata.

Siunnersuummittaaq siullermeerinnermi tamakkiisumik erserpoq, meerartaarnermut atatillugu aningaasaateqarfik pillugu Inatsisartut inatsisissaattut siunnersuummik Naalakkersuisut saqqummiussinissaat pillugu pituttuisuusumik aalajangiisoqannginnerani apeqqutinik naliligassanik pingaarutilinnik qulaajagassanillu suliassarpassuaqartoq.

Aalajangiiffigisassatut siunnersuutip akuerineqarneratigut aningaasatigut kingunerisassai siunnersuuteqartumit allaaserineqarsimangillat, soorluttaaq siunnersuummik siullermeerinnermi pissutsit ersarinnerulersinneqarsimangitsut. Meerartaarnermut atatillugu aningaasaateqarfik taarsiissuteqartarnermik suliaqartussaq pisariaqartitsineq naapertorlugu aningaasalersorneqartussaavoq. Tamanna sulisitsisut, sulisartut imaluunniit illuatungeriit taakku ataatsimoorlutik akiliuteqarnerisigut pisassaaq, soorluttaaq Namminersorlutik Oqartussat aalajangersimasumik annertussusilikkamik akiliuteqarsinnaasut. Tamanna pisinnaavoq sulisitsisunik isumaqatigiinniarnikkut imaluunniit matumunnga atugassanik aningaasanut inatsisissami pingaarnersiuinikkut.

Oqaatigineqareersutut meerartaarnermut atatillugu aningaasaateqarfik qanoq kimillu aningaasalersorneqassanersoq siullermeerinermi akissutissarsineqanngilaq. Aammattaaq Naalakkersuisut akissuteqaamminni qularutiginagu oqaatigaat meerartaarnermut atatillugu aningaasaateqarfik atuutilersinneqassappat kattuffiit meerartaarnermut atatillugu sulinngiffeqarnerup nalaani aningaasarsiaqartitsinissamik isumaqatigiissuteqareersut taarsiissutinik qinnuteqarumaartut. Meerartaarnermut atatillugu aningaasaateqarfik pillugu inatsisiliuunneratigut aningaasatigut kingunerisassat nassuiaasiorneqarnerani tamanna aamma qulaajanernejartariaqarpoq.

Sulisartut sulisitsisullu attuumassuteqartut tusarniarneqarnissaannut periarfissiisoqarsimannginnerata saniatigut meerartaarnermut atatillugu aningaasaaqarfik pillugu inatsisissatut siunnersuummik Naalakkersuisut saqqummiussinissaat pillugu aalajangiiniarnermut atatillugu aalajangiinissamut tunngaviit paasissutissiissutigineqanngippallaartut maannangaaq Ilaqutariinnermut Ataatsimiititaliamit oqaatigineqassaaq.

Tamatuma kingunerisaanik siunnersuut ilusimisut tunngaveqartoq akuersissutigineqarnissaa Ilaqutariinnermut Ataatsimiititaliap inassutigisinnaanngilaa. Aammattaaq tamatumunnga atatillugu pissutsit pillugit sulisartunik sulisitsisunillu isumaqatiginninniarnissanik aallartitsinissaq Ilaqutariinnermut Ataatsimiititaliap suliassa qarfiisa pisinnaatitaaffiisalu iluaniinngimmata erseqqissaatigineqassaaq.

Siunnersuummi pitsaasumik isummiunneqartut aalajangiusimaannarneqarnissaat tunngaviatigullu suliap ingerlateqqinnissaa nammineq piumassuseq aallaavigalugu isumaqatigiissummik tunngaveqarnissaa pingaaruteqartoq Ilaqutariinnermut Ataatsimiititaliaq isumaqarpoq, tamatuma kingorna Ilaqutariinnermut Ataatsimiititaliap inassutigissavaa:

- Tulliuttumi siunnersuummut allannguutissatut siunnersuut akuersissutigineqassasoq:

Sulisartut tamarmik ullormusiaqartitseriaatsimit atuutereersumit aningaasaqarnikkut pitsaanagerusumik atugassaqartinneqarnissaat qulakkeerniarlugu meerartaarnermut atatillugu aningaasaateqarfimmik nunatsinni pissutsinut naleqqussakkamik pilersitsinissamut periarfissamik misissuisoqarnissaa pineqartumullu ajornerulersitsinnginnissaq siunertaralugu sulisartunik sulisitsisunillu Naalakkersuisut isumaqatiginninniarnissaat pillugu Inatsisartut aalajangiiffigisassaattut siunnersuut.

Allannguutissatut siunnersuummi matumani meerartaarnermut atatillugu aningaasaateqarfik pillugu siunnersuut Akileraartarnermut Atugarissaarnissamullu Isumalioqatigiissitat isumaliutigisaannut ilaatinneqarsinnaanera mattunneqanngitsoq Ilaqutariinnermut Ataatsimiititaliap isumaqarpoq.

Ataatsimiititaliap inassuteqaataa.

Isumaliutissiisummi allannguutissatut siunnersuut saqqummiunneqartoq
akuersissutigineqassasoq Ilaqutariinnermut Ataatsimiititaliap inassutigaa
siunnersuutaaqqaartorlu itigartitsissutigineqassasoq inassutigalugu.

Taama oqaaseqarluni isumaliutissiisummilu oqaatigineqartut paasillugit siunnersuut
ataatsimiititaliap aappasaaniigassanngortippaa.

Debora Kleist
Siulittaasoq

Jane Petersen
Siulittaasup tullia

Astrid Fleischer Rex

Ruth Heilmann

Knud Kristiansen